



48. ԽԵԼՔԸ ՇԱՏ

Հ'առաջ, ժամանակով մեկ տղա կըլնի, ուրա սովորութենը ինչ ա՛ղընկներ քաղքի մեջ, ձեն տալով կը զըվըռենր.— Խելքս շա՛տ ա, մա՛լ շունիմ:

Դնաց մեկ օր մեկ բազրկյանի պատահով, ըտոր դուքնի ըռե-
ջով ձեն տվեց, թե.— Խելքս շատ ա, մալ շունիմ,— անցավ:

էտ բազրկյանը մտածեց, թե էտ ինչ բան էր, օր էտ տղեն ձեն տվեց՝ «Խելք շատ ունիմ, մալ շունիմ», խանչեց բերեց ուր մոտ:

Ըսեց.— Դու էտ ի՞նչ էր ձեն տվիր:

Թե ասեց.— Աղա, իմ սովորութեն էտմալ ա:

Ասեց.— Արի քեզի մի հարիր մանեթ փարա կիտամ, քեզի մեկ դուքյան կիտամ, տարին օր թըմըմավ, գուզամ քու Խելքի շատն ու քիչ դիմնամ:

Բերեց հարիր մանեթ փող տվեց, մեկ թեթև դուքյան տվեց. էտ մարթն ուրին մանրեզեն պռավ, ծախեց, բերեց մեկ շաքմաճա շի-
նեց, աշխատանքը թալեց էն շաքմաճի մեջ, էն հարիր մանեթին միշտ ապրանք սլահեց ուր դուքյան, հ'եվելի աշխատանքը թալեց շաքմաճեն:

Տարին օր թըմըմավ, բազրկյանը էկավ, էկավ նստավ, ասեց.— Խելքից շատ,— ասեց,— բե տեսնիմ ի՞նչ ա քու աշխատանք:

Ըսեց.— Ես չեմ գինա, շաքմաճեն զինա:

Չաքմաճեն քաշեց բերեց դրեց բազրկյանի հ'առէջ, հաշվեց, հարիր մանեթին էրկու հարիր մանեթ աշխատանք էր բերե մի տարվա մեջ:

Բազրկյանն ասեց.— Իմ ջան դուս դա, քեզի պես տղեն իտա կեխտոտ դուքյանի մեջ թողիմ նստի,— վերցուց տարավ դրեց ուր թոփածախս դուքնի հ'առեջ: Իմալ ռախտոտ էր էտ հեկթից շատը, օր բիրադի քաղաքի առուծախսը դարձավ ուրան վրեն: Բազրկյանը շատ սիրեց հեկթից շատին: Բազրկյանին մեկ հատ ախշիկ ուներ՝ լսի կտոր էր, վաղիւրի տղեն էլ մարդ կճամփեր առնելու, վաքիւրի տղեն էլ մարդ կճամփեր, բիրադի էտ քաղաքի մեծամեծներու տղեքներ դուզին էտ ախշիկը առնելու: Մեկ օր Բազրկյանն էկավ: հեկթից շատին ըսեց.— Դու էլ մեկ մարդ քրզի հմար հ'ուզընկան ճամփա, ես իմ ախշիկ քրզի կիտամ:

Ասեց.— Աղա՛, կէղնի՞ր օր ես համարձակվիմ, էտ բանին տեր էղնիմ:

Ըսեց.— Ախշիկն իմն ա, ես քեզի կըսեմ, օր մարդ ճամփա:

Ըսեց.— Օր դու կըսիս, ես էլ կճամփեմ:

Հ'ելավ ուր հավատարիմ ախպեր տղեքներուց մեկը ճամփեց: Գնաց տեսավ, օր վազիրի մարդն էկեր էր, վաքիւրի մարդն էլ էկեր էր, նստեր էր, մենծ-մենծ բազրկյաններու տղեկներ էկած են, նըստած են: էտ մարդն էլ դնաց նստավ: Հարցուցին, թե դու վի՛ր համար ես էկի:

Ըսեց.— Ես էլ էտ բազրկյանի պրիկաշշիկ հեկթից շատի համար իմ էկի: Պիծղացին ու ծափ զարկեցին:

Բազրկյանն ասեց.— Ես չըմ կարնա ըսե յա՛ ընդոր տղին կիտամ, յա՛ ընդոր. բիրադի էլ ընծի համար մեկ եք: Իրիկուն ամեն մարդ ուր նշան բերա, ախշիկ որի նշան որ վերցուց, ընտրան կիտամ, դուք հ'իրար հետ ուտել խմել, քեֆ ուրախութեն էրեք: էտ մարդեր հ'ելան դնացին, ամեն մարդ ուրան դյորա նշան պատրաստեց:

Բազրկյան հեկթից շատին ասեց.— Չէլնի թե ծախսի տակ ընկնես, մեկ մատանիք, մեկ հատ շալ կղնիս բոթնոցի մեջ կը ճամփես:

Իրկուն անմեկ մարդ առավ ուր նշան էկավ: Բերեցին բիրադի ջեռկով դրեցին: Բացեցին օր նազիրի տղեն միլիոնաշափ նշան ա ճամփե, վազիրի տղեն էլ ընտոր պես, բիրադի էտ հարուստներ մեկ մեկից հ'եվել նշան ա պատրաստած բերած: հեկթից շատի նշան բացեցին, տեսան, օր մեկ թեթև մատանի կա, մեկ մանեթ կիսու էլ շալ ա: էլի տնազ առան ու ծիծղացին թե՛ «Տեսե՛ք, մեկ մատանիով ու մեկ շալով էկեր ա մեր հետ նշան կը դնա»:

հանչեցին ախշկան բերեցին:

Ըսին.— Էսի ֆիլանի, էսի ֆստանի նշանն ա, ո՛ր մեկ կը վեր-
ցուա՝ վերու:

Ախշիկը էկավ խելքից շատի մատանիք վերցուց, պաքեց, էցկեց
մատը, շալն թալեց գլխուն, թողեց գնաց: Էտոնք բիրադի ըռկան՝
թե դու տես օր, իտա դդար մարդու նշան չվերցուց, գնաց մեկ պրի-
կաշիկի կեղտոտ մատնիք վերուց:

Բաղրկյանն ըսեց.— Նստեք կեր ու խում էնինք, քեֆ էնինք:

Էտոնք ըսին թե մենք քու հացը չենք ուտի:

Ըսեց.— Շատ հարկավորս չէ, թողե՛ք գացեք:

Թողին գացին:

Մե տասն օրից ետ բաղրկյաններ քոման էկան էտ բաղրկյանի
մոտ, քառսուն ռաղրկյանի գլխավորը էտ էր:

Ասեցին.— Բաղրկյա՛ն, մենք օր չէրթանք քաղքներ խրիտ
էնելու, մեր էրեխաներ չենք կրնա պահե, ժամանակը էկեր է օր
պըտի էրթանք:

Բաղրկյանն ըսեց.— Դուք գինաք օր ես ձեզի հերութեն եմ էրի,
դուք ըրիադի խամ տղա եք էղի, ես եմ սովորցուցե բիրադի, ես մկա
ծերացեր եմ, մուննաթ կէնիմ օր իմ տղեն դու պըտի տանեք, պարզ
հ'երես տանեք, պարզ հ'երես բերեք:

Բաղրկյաններն ըսեցին.— Մեր հեր դու ես, դու օր մուննաթ
յէնիս, պըտի տանենք ու բերենք:

— Դե,— ըսեց,— գացե՛ք, հ'ամեկ մարդ իր կարողութենի գյորա
պատրաստութեն տեսնի ֆլան ամսու ֆլան օրը դուս գա:

Բաղրկյան քառսուն բեռ ապրանք բռնեց, հեծավ ուր ձին, ըն-
կավ բեռներու հ'առեջ, բերեց քաղքից դուս հանեց: Էկան քառսուն
բաղրկյան դումարացան մեկ տեղ եռսուն իննը բաղրկյանից մուն-
նաթ էրեց, ըսեց.— Իմ տղեն ձեզի ամանաթ կիտամ, իմալ օր ես
ձեզի կտանինք կբերինք, դու էլ իմ տղեն տարեք բերեք:

Ըսեցին.— Մեր աչքի՛ վրա, քու լավութեն մեր վրա շատ ա,
էտ քու տված հացն ա օր մենք կուտենք:

Բարե մնա էղան իրարուց, բաղրկյան դարձավ քաղաք, ընտոնք
ընկան ճամփախ գացին: Դացին հասան ուրանց յուրտատեղն, օր
սըտի դիշեր մընեն, ջոկ ջոկ ուրանց բեռներ թափեցին, եռսուն իննը
բաղրկյան իրարու հետ մասլահաթ էրեցին, թե բերեք ամեն գիշեր
մեկ բեռ դողնանք, քառսուն օր ճամբախ կէրթանք, քառսուն բեռ
ապրանք ունի, շուրի հասնինք տեղ՝ օրը մեկ բեռ գողնալով՝ ապ-
րանքը կը վերջացունք, հըմալ էնինք օր էտի մեկ էլ ոտք քաղաք

1 Խոտլեցին (Մ. Բ.):

չթալա, բազրկյանի երես չելնի, ճամփեցին մեկ բեռ ապրանք գող-
ցան: Հ'ելան բիրադի բեռներ բառցան, էտ էլ ուր ծառաներուն
ըսեց. «Բառցե՛ք»: Ծռսուն իննը բեռ բարձան, էն մեկ ղաթիր բերե-
ցին, բեռ չկար:

էկան սսին, թե ա՛ղա, ղաթիր կա, բեռ չկա:

— Որ հըմալ է, իմ բեռներ թափեք: Բեռներ թափեց:

Բազրկյաններն ըսին.— Բառձի, ինչի՞ թափեցիր:

Ասեց.— Գացե՛ք, աստված ձեզ հետ էղնի:

Ընտոնք օր հեռեցան, բեռներ տվեց բառնալ, շիտկեց ղըռով
գնաց: Ասեց. «Ես էտոնց էրթած ճամփով չեմ էրթա»:

Հինգ օր կամ տասն օր գնաց, գնաց հասաւ մեկ էրկիր, տե-
սաւ հըմալ սով էր ընկե, օր անոթութենե ծովու ձկներն էլ կը լկլկին:
Գնաց մե քաղաք, հարցուց, թե. «Ձեր քաղաք ամբարդար կա՞»:

Ասեցին թե.— Կա՛:

Գնաց ամբարդարի հետ խոսաց, թե. «Ի՛նչ ղըգըր ցորեն ունիս»:

Ըսեց.— Ինչ ղըգըր հ՛ուզիս՝ ունիմ: Օրը հինգ խալվար առաւ,
տվեց փոեր թխել, չորս խալվար ցրվեց քաղաքացուն, մեկ խալվարն
էլ բրդեց, թափեց ծով: Քառսուն օր պահեց ծովու ձկներն էլ, քա-
ղաքացին էլ: Քառսուն օրից ետ էտոր կարողութեն պրծաւ, իմալ
էղաւ, օր նոքարները հաց կուզին, հաց ձեռ չէր ընկնի:

Ձկներ գացին ուրենց թագավորին ըսեցին, թե.— Մեկ բարեկի
հողածին է էկե, քառսուն օր քու հըռեաթը պահեց, էն մարդը օր
չէղներ, քու հըռեաթ բիրադի կը ջարդվեր:

Թագավոր մեկ քող տվեց, ասեց.— Գացե՛ք էն հողածին բերեք
իմ մոտ:

Իրեք ձուկ էկան ասեցին.— Աղա՛, մեր թագավոր քեզի կը
խանչա:

Ըսեց.— Ախր դու ձուկ իք ծովի մեջ, ես իսան իմ՝ կը խեղդվիմ:
էն քողը տվեցին, ըսեցին.— Առ էտի էծկա գլոխդ, էլ չը խեղդը-
վիս, մենք քեզի կըտանինք:

Քողն էծկեցին գլոխ, հ'ելաւ նստաւ ձկներու մեջքին, տարան:
Ճամփախ ըսեցին թե.— Ա՛ղա, դու էտ լավութեն էրիր ես, մենք
թագավորին ըսիր ինք, թագավոր քեզի բախշիշ կիտա, իրեք ան-
գամ օր իլղար կառնիս թագավորի բերնեն, մեկ սուփրա ունի, էնի
գուզիս: էնի թագավոր ա, ուր խոսքից ետ շի դառնա, կիտա:

Առան, գացին թագավորի մոտ: էտ մարդը գնաց թագավորին
գլոխ տվեց, թագավոր տեղ տվեց նստաւ, ասեց.— Հողածին, էն
լավութեն օր դու ես էրի,— ասեց,— հ՛ուզա տամ:

Ասեց.— Քու սաղութեն դուղեմ:

Մեկ էլ ասեց.— Հ'ուզա տամ:

Իրեք անգամ իլղար առավ թագավորի բերնեն: Ասեց.— Մեկ սուֆրա ունիս, էն սուֆրեն տուր:

Ասեց.— Քու սովորցրնողի վիղը կոտրի:

Ասեց.— Խոսքս գացեր ա, բերեք տվեք:— Բերին տվին, շնորհակալութեն արավ թագավորից, էտ ձկներ բերեցին, էլի դուս հանին:

Ձկներ օր դարձան մասլահաթ էրին, թե՛ թագավորը էն մարդու հաց չէր կերի, էտ զղար բաշխիշ տվեց, հ'ըպա մենք ինչ պըտի էնինք, օր քառսուն օր մեղի պահեց, պահպանեց: Ձկներուն ըսեցին, ընկան ծովու մեջ: Ինչքան անգին քարեր կար ծովի մեջ, ժողվեցին բերին ծովու դրաղ քոմեցին¹: Լուսն օր բացվավ, Խելքից շատը հ'եկավ տեսավ, ասեց ուր ծառաներուն ձիու փեյինները շաղեցին, ամեկու մեջ վեց հատ կամ ութը հատ դրեց ու քյարփինշ թափեց: Նոսուն ութ բեռը ըտրնե բռնեց, մեկ բեռն էլ խամ աթար բռնեց: Բեռներն օր բռնեց, պրծավ, էկավ էրկու քաղաքացոց շնորհակալութեն առավ, քաղաքացիկ էլ էն մարդից շնորհակալութեն առան, ու էկան ճամբախ: էկավ հունվար ամսու մեկ օր բեռները թափեց էն տեղը, օր բեռը կորեր էր: Քիչ մնաց, տեսավ մեկ բաղըրկյան էլ էկավ, չուրի մութն առավ, քառասուն բաղըրկյանն էլ էկան ժողովվան մեկ տեղ:

Հունվարի ժամանակն էր, ձմեռ տվեց վրենները, սաստիկ բուքն ու ցուրտը, ուր ծառաներին ասեց.— Խամ աթարներից մեկ բեռ բերեք վառեք, տաքցեք:

Օր վառեցին, կրակը բանցրցավ, տեսան մեկեկ բաղըրկյանները ուրանց ծառաներուց էրկուսը ճամբեցին, թե.— Գնացեք տեսեք էտ ի՞նչ վառելիք ունին, օր էտպես գյուռ կը վառին:

էկան հարցուցին: Ըսին, թե.— Մեր բեռներ բիրազի աթար ա:— Չհավատացին:

Ըսեցին.— էկեք տեսեք:— էկան տեսան օր բիրազի աթար էր: Գացին ուրանց բաղըրկյաններին ասին, թե՛ ա՛խոր քառսուն բեռն էլ աթար ա:

Ըսեցին.— Գացեք մեկ բեռ բերեք վառենք: էրթանք քաղաք էրկու բեռ տանք:

¹ Կիտեկ (Մ. Բ.):

էկան ըսին.— Մեր բազրկյաններ կասեն, մեկ բեռ թող տա
վառինք, էրթանք քաղաք, էրկու բեռ տանք:

էն էլ ասեց.— Գացեք ձեր բազրկյաններուն ասեք, էրկու բեռ
չենք ուզե, ինչ աթար տամ, էն աթարից տան, միայն դացեք պայ-
մանը գրեք բերեք: Հաստատ պայմանը գրեցին, փեշատները զար-
կեցին:

Խելքից շատը ուր ծառաներաց ասեց.— Մի բառենք, թող ըն-
տոնք հ'առեջ էրթան, ընտոնք օր բառան, դադին հ'առեջ, նոր Խել-
քից շատը ուր բեռներ բառնալ տվեց: Ընտոնք օր գացին, բազրկյան
բաշին հեծավ ձին, էկավ հ'առեջներ, տեսավ օր եռսունինը բազըր-
կյանն կեն, ուր տղեն չկեր:

Հարցուց ասեց.— Ո՞ւր ա մեր տղեն, չկա:

Ասեց.— Ընդուր անունն էլ դու կիտա՞ս հըլա:

— Թե ընչի՞:

Ըսեցին.— Քառսուն բեռ աթար ա բերի:

Ըսեց.— Էտմալ բան կէղնի՞, աթար ընչի՞ պըտի բերա:

Ասեց.— Մեկ բեռն էլ մենք առեր ենք, վառեր ենք, օր էրկու
բեռ պըտի տանք:

Բազրկյան բաշին ետ դարձավ ուր տուն, մեկ նամակ գրեց,
տվեց ծառայի ձեռ, ասեց.— Էնտոր բերած ապրանք ընձի հարկա-
վոր չէ, օր քաղաք մտեր ա, գլոխ կիտամ զարկել:

Մառան նամակը բերեց տվեց Խելքից շատին:

Նամակն օր առավ կարդաց, ասեց.— Գնա՛ բազրկյան բաշուն
ասա, մեկ տեղ տա գիշերս սըթըրվիմ, լուսուն գելնիմ, քանի օր
ընտոր անուն կա, կէրթամ, չըմ մնա քաղաք:

Մառան էկավ, ասեց.— Թող էրթա ֆիլան ղազանոց սըթըրվի:

Մառեն գնաց ասեց թե՛ «Թող էրթա ֆիլան ղազանոց սըթըրվի»:
Քաշեց ուր բեռները բերեց լցեց ղազանոցի մեկ կողմը, ղաթըրները
կապեց, ժողվան ուր ծառաներով, սուֆրեն բացեց, կերան, խմեցին
ու քեֆ էրեցին ուրենց համար: Բազրկյան բաշու աղջիկ շատ դեմ
րնկավ մորն, ըսեց.— Մե էրկու հաց տուր տանիմ տամ Խելքից շա-
տին, ճամփուց է էկե, անոթի կէղնի, մեկ էլ երեսը տեսնիմ, ես դի-
տամ, բազրկյան բաշին էլ չը թողա օր քաղաք տենի, իրարու երես
տեսնինք:

Մերը բերեց էրկու հաց տվեց ախչկան, ախչիկ շարսաբը քա-
շեց Ելխուն, գնաց, գնաց հասավ ղազանոցի մոտը, տեսավ օր շատ
զարմանալի լուս կերեք ղազանոցից: Գնաց փանշարից իշկեց, տե-
սավ Խելքից շատ մեկ սուֆրա ա փռե, օր մեկ ստաքանի արժողու-

թեն արժենա ուր հոր կարողութեն, բիրադի անգին քարից, չամ շրադից, ակունքներուց:

Ախլիկ դարձավ էկավ ուր հոր տուն, մորն ըսեց.— Ես գինամ որ իմ խելքից շատ էն տղերներուց չէ, մեկ սուֆրա է փռե, օր մեկ ստաքան, մեկ շաշի տակ ածի իմ հոր կարողութեն:

Մերն էլ դնաց բազրկյան բաշու ասեց, թե.— խելքից շատ մի էնսիսի սուֆրա ա բերե:

Բազրկյան բաշին հելավ գնաց, գնաց փանշարից իշկեց, օր ախլիկ խոսք օղորթ ա: Ձեն տվեց, թե.— էկեք գուռը բացեք:

Հելան գուռը բացեցին, բազրկյան բաշին ներս էկավ, խելքից շատը հելալ տեղից կայնավ, քաշեց տեղը նստեցուց: Բազրկյան բաշին օր տեսավ էս սուֆրի կարողութեն, խելքը գլխուց գնաց:

Ըսեց.— Ձէ՛, թե օր կթողուս էն մեծ օթախի մեջ դնիմ, կիգամ, թե չէ՛ չըմ հիգա:

Ըսեց.— Լա՛վ, հելի գիշեր բարձի էրթանք, մարդ շտեսնի մեզի:

— Ձէ,— ըսեց,— արևը պըտի էրկու բոյ էլնի, նոր բառնամ գամ: Բազրկյան բաշին հելալ, առավ սուֆրեն գնաց: Լուսն օր բացվալ արևն սուալ, մեր խելքից շատ բարձավ բեռներն ու գնաց: Բազրկյաննները հըմմեն տեղ ասացին, թե աթար ա բերի: Սաղ քաղբըցիք ժողվան էկան, հա՛ էրեցին, հո՛ւռա էրեցին, ծիծղացին: Քշեց բեռները, բերեց բազրկյան բաշու գուռը թափեց:

Բազրկյանն ըսեց.— Որդի՛, թող ծառաները տեղավորին, դու բրտնած ես, ներս արի:

— Ձէ,— ասեց,— չէղած բան ա: Քանի օր իմ մեկ բեռը դուս ա, ես նես պըտի չիգամ: Քաշեց բիրադի բեռները, էն լավ օթախի մեջ, նոր էկավ, բազրկյան բաշու մոտ նստավ:

էրկու օրից ետ բազրկյան բաշին խելքից շատին ասեց.— Բազրկյաններ էսօր կէրթան թագավորին տեսութեն, ես էլ կէրթամ, գու էլ կէրթաս դուքյանից լավ ճոթեր կդնես բոթնոցի մեջ, ծածկոց կը քաշես վրեն, կը բերես:

Բազրկյան բաշին օր գնաց, խելքից շատը հելալ շորս հատ աթար որեց բոթնոցի մեջ, խաս ծածկոց քաշեց վրեն, բերեց տեսավ, օր Լոեսուն իննը բազրկյանի ընծեն էլ էկեր էր, բերեց բիրադնից վիյու դրեց: Թագավորը իրավունք տվեց բանալու: Բացեցին էտոր ընծեն օր աթար էր դրած մեջը՝ թագավորը հերստավ:

1 Բնագրում չկա՝ չէ (Մ. Կ.):

Ըսեց.— Ընձի ի՞նչ համարեցիր, օր էտ աթարը բերեցիր, թե հայվան կը համարեր՝ խոտ դարման բերեր:

Խելքից շատ խնդրվավ, ըսեց.— Իրավունք տուր ջարդեմ էս աթարները:

Իրավունք տվեց թագավորը, ջարդեց աթարները, ամեկու մեջն չորս հատ անգին քար հանեց, սրբեց, դրեց վար: Թագավորի գլուխը ուռավ, փափախը գլխուց ընկավ թե.— Նս թագավոր իմ, էտ մեկ քարի կարողութեն չունիմ, է՛ւմալ էլ հարստութեն կէզնի՞, օր էտ դդար ընծա բերեց ընձի: Բաղրկյանները օր էտ քարերը տեսան, մոթները ճղավ, արուն թափավ: Խելքից շատը հանեց պայման տվեց թագավորին, թագավորը կարդաց, օր եռեսուն իննը բաղրկյան պայման են դրե՝ «Ինչ աթար առնինք, էն աթարից տանք»: Մեկ բեռ էտ աթարից տվեր եմ, տարած վառած են:

Թագավորն ըսեց բաղրկյաններուն.— Ի՞նչ կասիք, ի՞նչ պըտի տաք էտոր աթարներուն դեմ:

Բաղրկյաններուն լեզուն բռնվավ, ըսեցին.— Թագավոր, խիղճ մացեր ա ուրին՝ մեր կնիկ էրեխեք էլ տանք, չընք աղատվի էտոր ձեռնիցը:

Արի տես, օր բաղրկյան բաշին քիչ ա մացե օր խելքը թռու, կայներ ա կասա՝ «Անպատճառ պըտի առնիմ ու առնիմ»:

Խելքից շատը տեսավ օր բաղրկյան բաշին շատ բանից հ՛ելավ, խանչեց դուս հանեց, ասեց.— Բաղրկյան բաշի, մի՛ շատ բարկանա, էտ աթարից չեմ տվե, խամ աթար եմ տվե:

Բաղրկյան բաշին ըսեց.— Բա ի՞նչ էնինք:

Ըսեց.— Օր շատ ոտքդ ձեռքդ գըյնին, բախշա, խամ աթար իմ տվե:

Թագավոր, վազիր նազիրով ընկան մեջ բարիշուքեն էցկեցին մեջներ, շատ օր ոտ ընկան, բաղրկյան բաշին բաշխեց: Պայմանը տվեցին ճղեցին: Թագավորից շնորհակալութեն առան ու բիրադի հ՛ելան գնացին:

Բաղրկյան բաշին էկավ ու հարսնքի թատարուք էրեց: Հարսնիք բռնեցին, յոթն օր յոթը գիշեր հարսնիք էրեցին. էն հասավ ուր մուրազին, դուն էլ հասնիս քու մուրազին:

Աստծուց իրեք խնձոր իջավ, մեկը ըսողին, մեկ լսողին, մեկն անկաջ էնողին: